

崇百藥齋文集

崇百藥齋文集第五

陽湖陸繼輅孫

歸輿集

沂州早發

了了還鄉夢匆匆奈易醒
空林森夜氣疎雨露春星侵
曉寒逾重消愁酒不靈
却憐轅下馬瘦影亦伶俜

示暉甥

彙目

筍輿一步一低昂
觸撥鄉思到野航
入世何心希蔡澤
卜居終擬效韓康
疎林三面接天遠
新韭半畦如草芳
料得艤舟亭畔雨
儘添濃綠壓長廊

杏花

亂山高下送征鞍，惻惻單衣透暮寒。一谷杏花紅不暝，
強留春影待誰看。

古意

送君向長安，是妾昔行路。黃塵高接天，迷却望君處。
楊柳江南樹，誰栽官道邊。空有留人態，翻教折作鞭。
妾夢忽已醒，君行那更遲。分明殘月下，霜影動鞭絲。

金蓮花代友人館課

蕭寥曲徑耐幽尋，珍重三年蓄艾心。偶值歲寒齊竹柏，
終愁性熱誤侵苓。幾人愛菊憐形似，有客探梅愴獨吟。
學佛未能還帶酒，且拋新賦換黃金。

古意戲邀張侍御

問陶 同作

預擬春遊願總乖踏青自惜鳳頭鞋秋深久分忘紈扇
嫁早翻教典玉釵一任小姑撫寫韻未妨鄰女笑持齋
新來休更防鸚武果得卿言亦復佳

爲楊二

紹文

題其內子澹音閣詩

墮地誤作男識字集憂患浮名定何物輒以庸福換積
悔已十年結習苦未斷女嬃本嬋媛奈何好詞翰十五
名父息從官值離亂二十嫁星郎一匏繫薄宦詎非詩
爲祟遲子翟芾粲山妻頗耽此近亦廢書歎流離喬公
女小小邁家難得婿雖足歡入世若冰炭陳平不長賤
此語久成謾來者冀可追書城逝將竄謹告心所危爲
子裂黃絹

送魏同年襄補官河南余亦以是日南下

孤兒鮮兄弟所恃唯友朋憶初識君時秋水雙臚清相
愛定誰始但覺懷抱傾十五儂俠游十六思擘經顧謝
里中少放却臂上鷹塾師頗稱譽行將掇科名長者語
非妄逐隊歌鹿鳴豈知君胸中別有夙夜盟春官宴多
士霓裳爛蓬瀛同學各努力矯矯姚與彭君獨不得進
容色夷然平或疑樂外仕三十當專城豈知君胸中別
有逕寸冰爰風何烈烈黃塵杳冥冥肌膚半焦枯一濯
思清冷鄉音忽入耳聽此柔櫓聲憐君策瘦馬獨向河
南行君行百無慮所慮在性情慮汝折腰苦拜跪非所
勝慮汝催科拙鞭扑未忍聽慮汝謁上官面目或可憎

偶發一言善已使衆耳驚補苴旣鬱鬱更張益兢兢丈夫不行意何用遣平生我今暫歸去恨乏田可耕汝官恐不免竊祿誰復矜人海浩茫茫未保相見仍歧路一揮手百感來縱橫

偶述

曉鏡明霜刃輕塵走犢車機空蘇氏錦障撤謝娘紗灑墨香蘭笑添衣碧月斜誰憐花外影終夜泣琵琶昭容持玉秤姹女出金房綵勝懸初度官花顛兩行擘牋何綺麗失箸太蒼黃奇字新來少朱門掩夕陽

完顏太守

廷錫

乞賦園中草木猝猝未暇以爲歸

舟苦悶却寄三首

庭前馬纓花顏色使我傷耐久固爲好母乃損幽芳憶
汝始作花姿風正飛揚未忍遽委化秋心益徬徨徬徨
復何爲零落終有時不如原上草榮悴無人知

招涼失清曉午風吹暗塵牽牛何娟娟花發如避人我
就主人飲畱宿常經旬關河阻鄉夢見此顏色真星期
太迢遞况復非陽春願得忘憂草持以獻天孫

葵花傾太陽忽被風雨侵柔條一以推誰復知初心感
此不成醉淒然念升沈得地尙如此委運匪自今矧彼
託根誤憔悴山之陰

寄汪大

全泰

被服一品衣不使容色妍如何出世姿徒聞惜華年敏

門乞水火水竭火不燃萬物在他人貴賤皆無權人生
可自致唯有佛與仙俗儒難所易瞠目驚狂言所無亦
勿求所有亦勿捐期子保精氣與子凌飛煙

舟中夜起懷都門諸子

夢醒櫓聲寂招涼推短篷星光爭曉月燈影誤飛蟲小
別又千里秋花開幾叢車輪知未轉夜氣亦空濛

櫻桃

櫻桃一樹隱彫闌香酪親調赤玉盤昨夜東風吹折損
可煩重進柘漿寒

答宋同年

翔鳳

俊翮望先舉飛花共一林頻揮臨別淚益愴未歸心此

去梗猶泛相思秋易深吾行自調護愁汝薄寒侵
約指雙銀在朝雲綺夢非何因通宛轉祇是惜芳菲心
事羞團扇歸期誤錦衣誰家弄長笛偏奏鶴南飛

水聲

水聲涼到枕夢醒此何時篙師忽相喚村雞無數啼自
起剪殘燭誰與護秋衣忍寒良久坐默默還入帷

滄州道中周二濟 同作

翠袖寒如此桃花豔不銷傷春秋士淚乞食玉人簫漂
泊生涯誤關河客路遙始憐吳市酒孤憤未全澆

寄薛六玉堂

破屋倚高樹到門聞詠詩無人知大隱此口有微詞病

婦誇徐淑驕兒似袁師故鄉歸亦好何以決然疑

饑鳥篇

饑鳥不入羣孤飛遶荒田田荒那得食欲去還遷延我
從田畔來訝此毛羽鮮趨前欲相撫驚飛高樹巔雕籠
設飲啄鸚武工爲言幽棲抱野性不習君子憐自愧知
汝淺愛乃違其天相逢更相失送汝投寒煙

舟行多阻恐家人凝望先寄以詩

涼風蕭蕭忽而至半年別汝成何事燕臺春好花亂開
少年各舉花前杯三更繡陌灑飛雨一夕朱顏成死灰
並蒂之花先後落春本無權分厚薄可奈蜂狂蝶亦痴
處處穿簾兼入幕我時委巷聊閉關夕陽倚遍中庭欄

誠知無得固無失，免汝翟芾生慚顏。
黃塵如山愁據鞍，擁書差喜篷窗寬。
回飈淺渚更多阻，孤吟薄醉難爲歡。
篙師曳絳赤日下，十里五里行蹒跚。
此曹同抱故鄉思，驅迫寧有雙飛翰。
吾生事事落人後，歸路那復心憂煩。
燕南趙北秋寥泐，白草茫茫接天闊。
相看顏色于我真，獨有江南一輪月。
我行還家弗再出，照我披帷話離別。

過德州贈孫糧儲

星衍

一鶴共俯仰，秋懷似水清。
仙才忘少作，吏治薄廉名。
金石軒窗古，湖山去住情。
短檠猶故物，應照著書成。

德州阻風

衰草蒼茫沒夕暉，篷窗低傍水之湄。
歸舟豈有乘風願。

任爾朝南暮北吹

題蔣心餘先生四絃秋樂府

苦竹黃蘆又幾秋青衫長汝淚痕浮琵琶一曲忽忽罷
愁絕歸人上水舟

乍寒

客路驚新月歸心急乍寒檢衣添半臂開篋置輕紈醉
淡不成夢起遲常減餐從教護明鏡難掩帶圍寬

刪訂舊詩見吳二堦題句次韻

感君題句意纏綿添我孤吟遣醉眠歷歷悲歡疑昨夢

區區恩怨薄前賢

舟中攜明
七子詩

果能焚研應非晚略解吹

簫已得仙除是性情終不泯有人惆悵抱殘編

裁詩十歲卽逢君每過西州愴夕曛

余初識君于西禾外舅席上

少

日才名渾一笑天涯離恨總平分
銜香坐看蜂成隊聽雨遙憐鴈失羣
故紙模糊增護惜他時驗取淚痕紛

傷足有述

草木不獨榮禽鳥不失羣
宇宙何寥廓恃我平生親一朝
撻疾痛始悟非一身寧不感調護
肢體終有分昔賢慎跬步傷趾懷
先人勿謂偶蹉跌謹小古所云各負
七尺軀曷助嗟何因立身苟不保
割席徒聲吞

七夕

爲誰眄到可憐宵月色波光一望遙
照出玉人秋夜影滿身香露鬢絲飄

銀河小隔一灣秋，安穩雲軒渡碧流。那似人間歸路遠，
聽風聽雨不勝愁。

獨漉

獨漉獨漉，天寒酒濁，天寒愁路遠。酒濁愁夜長，夜長猶
自可。路遠摧中腸。北斗忽已沒，曉風何淒淒。推篷望故
鄉，不辨東與西。俠劍不再試，驚禽不再至。勿恨歸路遠，
但悔出門易。羲和鞭日鏗，有聲我欲繫。日無長繩，不須
長繩繫白日。但當還家，勿復出。

武城晚泊

日落水波豔，月高雲影涼。捲簾秋有色，說劍酒生芒。
緒客緒此時好，歸塗爾許長。夜寒何太逼，寂寞掩昏黃。

檢得趙青州

懷玉

正月書却寄

先人罷郡返鄉里里門宏獎風初起憶我垂髫請業初

往往趨庭識奇士就中楊君最先達南枝北枝花競發

星園太守西禾大令

稍聞莊段

竹坪竹畝兩孝廉

貢賢書旋報孫淵如洪

雅存太史

直禁闔相逢話舊同揮涕誇我兒時頭角異卽今

三十竟何成頗覺都非意中事舍人才高數亦奇一官

吟老庭前薇當時鄰里待舉火此日侏儒笑忍饑無聊

乞佐東方郡差喜官厨有良醞捧檄依然負米心一麾

遽抱終天恨麻衣星夜走蒼黃落日渾河喚野航似聽

篙師歎廉吏并無惹草壓歸裝篋篋急唱公無渡何意

陽侯阻行路爲有灌岡表墓文幾成屈子懷沙賦頻年

風木黯傷心偶過師門碧蘚侵指點年時譚譙地竹聲

樹色總蕭森今春我逐公車隊斜月西堂

雅存太史所居

設高

會段君近欲棄儒冠苦說成名望余最君更馳書到客

舟開函三復不勝愁自言此事終無分不信文章與命

離青門三月春如霧委巷蕭條閉幽素行卷慵投春草

詩風簷大索飛花句隱隱輕雷轉畫輪元規扇底鎮愁

人樽前半掩王維面衆裏從看東野身歸舟意緒成悽

惻檢得君書增歎息想見憐才感遇心淚痕浣盡青衫

色我昔飛揚竹馬年先人剝下聽清言引經輒注瑯琊

稻獻頌私成秦岱篇居然意氣凌八表劣虎優龍結交

早

謂莊氏丁氏兄弟

嫁女都忘曲逆貧生兒祇愛孫郎好鏡裏

朱顏暗自傷，忽忽流水送年光。好譚氣節終非福，解讀
離騷便不祥。君惟吏議官重謫，沈腰折損吁誰惜。閉戶
時驚鶴俸無出山，又羨鷗眠適好憑。講席占湖山，莫更
浮家戀官職。不見孫君鄉思深，報劉一慟頭全白。頃過
先生值有大母之喪乞假不獲篷窗日日數歸程，客感無端悔此行。遲
我春申江上月，君客上海濃愁吹破玉簫聲。

孟蘭盆會歌二首

佛心念鬼不念人，佛會大啟孟蘭盆。鬼腹彭亨復何補，
東方州郡正禱雨。慈雲不來柰爾何，懼爾法食儲無多。
地上人聲稀，地下鬼聲沸。楚蜀前年苦兵事，國殤定已
得解脫。盜賊何因任遊戲，佛乎慧眼照大千。勿使攫食

來人間人未爲鬼佛不憐

東昌雨泊

早作辭巢鳥天寒念故林孤舟一夜雨倦客十年心倚
枕聽潮長推篷送月沈依依舊來意只覺酒杯深

懷里中諸子

蘭氣全消花骨枯我能空際畫狂奴歌姬院落先生柳
兩幅都題乞食圖

錢三季重

未須明月辟輕塵不啟重關又浹旬一院秋聲花四面
此中容易著詩人

錢大中鉤

麻衣下地淚痕深十載方知孝婦心此日簞塵休更拂
都來簾押做秋陰

莊大軫

老母頻煩問起居書來一度一欷歔相思偶學齊梁語
願作重帷護讀書

趙大學彭

天涯

天涯去住總忽忽誰遣將身作斷篷塵世本來辛苦地
浮生半在別離中露蟲攪夢聽終夜野樹無情見一叢
者是幾分秋色裏消魂殘月又如弓

對月用扇頭張侍御除夕對月詩韻

草色連雲綠漸彫一鈎頓使碧天遙寧知下界愁風雨
可有神仙住九霄幾處孤吟寒未寢何人雙坐酒同澆
鏡中我亦相思影暫許分明遣此宵

分水龍王廟

一水分南北中疑有轉輪漫拋歧路淚且浣客衣塵回首浮雲遠驚心碧月新龍君休見阻我是倦遊人

寄楊兵備二丈

焯

送我正扶病知君鄉思縈氣櫻丞相怒心得美人傾獨坐安棋嶽旁觀鬪酒兵春明花事盡珍重客中情

魚臺道中見殘荷作

道旁一方塘殘荷委無數淒然念薰風何因問鷓鴣

寄蔡少司成師

之定

毛羽飄零久勞將一鶚看感公惆悵意使我去留難風雨雞鳴誤江湖雁影單春陰深幾許此別路漫漫

舟入江南周二

濟

淒然有惜別之色詩以慰之

曾聞蜀山好君是蜀山農攜我入圖畫秋雲定幾重懸
知香稻熟況有舊醅濃預約峰頭月危厓照短筇

再贈周二

誰省此年少頽然已半醺惡喧逃北里放膽對南薰同
姓周公瑾三生杜司勳

君喜譚兵亦頗有聲
伎之好故以爲此

傷春復傷

別清淚滿斜曛

過沛縣作

彈指功名百戰成英雄老去淚縱橫猜疑定獄能無悔
富貴還鄉亦至情愛子死償諸將命故人頭報一杯羹
風雲尙護荒臺否寂寞寒暄下古城

過牖

一牖三日守一日五牖過遲速各有時此障本易破誰能於事前怡然受折挫

夢萬十一過訪簡園同飲綠梅花下疎英未放蓋猶出門時情事也枕上口占紀之

聞攜琴鶴領蘇臺

時新調元和

珍重閒情入夢來我別鄉園

秋已老可憐猶記未開梅

將抵黃河作

東方久無雨夾岸秋蝗飛淮徐苦河患水漲及半扉行者盡室去居者猶忍饑極目何蕭條落日炊煙稀天心至仁愛曷不一轉移獨客自多感惻愴聊賦詩

高郵道中

斜日一帆孤閒雲沒欲無城高微露塔水關乍通湖人

去憐秋影謂保緒天寒念酒徒謂心庵鹿軒休教最圓月只與

照菰蒲

題襟館消寒第二集分題曾都轉所藏畫得管夫

人疎篁遠岫

展卷先驚秀可餐春風著意護檀欒遠峰定如眉痕好

翠袖能禁竹影寒南渡湖山供染翰雙棲歲月遣憑闌

舊遊憶趁漚波漲石筍摩挲幾度看戊午春借伯元先生子白蔣山訪蓮

花莊石筍數峰猶故物也

又和郭三琦題勾龍爽村莊嫁女圖

嫁女不擇日相約月團團心知上絃過不敢卷簾看

嫁女不離鄉，離鄉意悲楚。三日聞敝門，阿嬈來看女。
嫁女不愆期，二八容色好。綠布裁作裙，低頭玩芳草。

又和吳祭酒

錫麒

題宋徽宗雪江歸棹圖

此夜穹廬雪，何因聽棹聲。帝衣青有淚，天水碧無情。
鄉夢春先斷，歸心畫易成。寧知湖上舫，燈火徹宵明。

又和樂三題楊補之孤山月色

漫攜玉篋奏刀鐙，綺袂禁寒去復還。可有羈魂歸夜月，
用姜白石詞意不堪夢影斷燕山。蹇驢踏雪英雄老，畫舫探春
宰相閒。惆悵半林空，向暖一枝驛使更誰攀。

又和金十題王若水斷橋風雨

閒漚夢醒鶴飛回，黯黯湖雲掃不開。我怪梅花緣底事，

前身風雨爲春來

又和劉大題薛素素蘭

瀟湘春水碧隱谷野雲深天豈憐幽草花能耐苦陰相
思聞蕙歎多恨是琴心嬌鬢新來換何因傍玉簪

爲樂三題青芝山館圖

樂生抱山癖而無買山資矜期託圖畫展讀聊自怡東
南足名勝獨秀非青芝欣然愜幽賞遂若爲我私人生
本寄耳何必多然疑

築室固亦好餘願或竟虛山靈勿相誚華屋多邱墟他
年訂山經有客得此圖未識圖中人謂實山中居山靈
憶我言劃然發軒渠絹素豈長好我言良亦愚

端居偶根觸逆旅繫去思邱壑况所耽登臨輒忘疲生
爲有情物安能絕貪癡貪亦諒無幾我取人或遺飲水
但滿腹巢林止一枝汲汲五岳游此客太嗜奇

先人有敝廬寬然足容膝屋旁一小園水木頗明瑟早
作辭巢禽良時易相失饑驅不任咎子自有情骨曷不
勤鋤犁食指僅六七君如果移家慎勿蹈前轍湖上多
水田耕讀一生畢

楊刑部

夢符

泣硯圖歌爲公子

紹恭

作

泣硯歌我歌泣硯心蹉跎楊家寶此已三世使我感歎
重摩挲我無詞賦述世德忍聽君家話疇昔亦有孤兒
淚萬行爲君添染傷心色先人嗜學手不停一官蕭然

如水清朝出判牘夜注經有時閣筆聞歎聲祿不逮養
孤平生兩家先人同一情未識我硯落何所圖史金石
皆漂零孝經論語粗能記讀本而今亦殘敝黯澹硃痕
手自題分明下九初三字各有偏親鬢已皤磨人子墨
柰卿何不知此日披圖淚孰與當時泣研多

題郭十三

麟

病中懷人詩

當窗寫韻人如玉掩闥焚香婢拂琴消得鄰園三月住
可無小病答春陰

爲王鍊舟題其先人未成畫冊

粉本粗完已耐尋蕭蕭風木愴秋心憑誰爲寫孤兒恨
添個枝頭反哺禽

不寐簡樂三

莫恃酒澆愁愁多酒成淚清迴抱孤心何因得成醉
拋將十年易遣此一宵難忽憶庭前鶴休教中薄寒
去住都成戀悲歡那自由憐君歸路遠未敢訴鄉愁

嘲竹

一院聲蕭蕭風影亂叢筱此君尙折腰梅花應絕倒

夢影

夢影分明在華年去不還已拚成逝水切莫起波瀾

消寒第四集分賦淮海神絃曲得東陵聖母祠

東陵母仙耶非廣陵道勿拾遺苟爲竊神知之青鳥來
集靈旗靈旗指汝敢復欺問胡爲然寒與饑民不畏法

神所治民不犯法神所慈願神降福暘雨時倉有黍稷
機有絲神鳥神鳥安厥棲

繡女祠

伊墨卿太守所分題繡女者宋宮人南渡時遺落揚州學道仙去

飄靈風兮采旄神之來兮江皋踐郁烈兮塗椒薦芬芳
兮溪毛神勿悲兮失路望錢唐兮迢遙昔蒼梧之不延
兮亦永棄乎二姚唯神女之解脫兮謝團扇于秋高唱
揚音兮浩歎袂障日兮徒勞

宋徽宗石室養馬圖

消寒第二集王湯甫學博所分題詩久不就補作一首

慘澹丹青恨未除山河重秀竟何如欲全狡兔先烹狗
待搗黃龍已跨驢半壁有天仇共戴十年爲沼願終虛
諸臣當日爭和議那不先陳越絕書

蔣二知節招飲寓齋分賦食物得糟筍

依然三徑護檀欒
苜蓿偏加病後餐
醉到此君無獨醒
客來寒夜有春盤
蕭蕭月影橫窗見
隱隱雷聲破曉看
說與舊時雙燕子
牽蘿遲汝話平安

消寒第七集續賦神絃

邗溝大王廟

考服鼓兮鳴鐘願
劔珮兮雍容彼貧富
其自爲兮孰尸
其功神坐享此禋祀
兮孰酬其庸謂冥默
之有宰兮又神聽之
不聰豈賞盜而導淫
兮不上達乎九重紛
萬口之詛與祝兮將
何去而何從何如貧
富之不相耀兮還毀
譽于太空果吾言兮
可采燬神祠兮罔恫

二郎神廟

浪浪兮天風驚濤兮萬重撫長劔兮從空割左耳兮乖
龍嗟少見兮多怪侈美譚兮終童亭亭兮玉貌神仙兮
年少悼人壽兮須臾獨徘徊兮夕照

伊太守

秉綬

招飲六一堂話別有作

先子十年寧化宰不知卽是鄭公鄉遺碑見說今猶在
可有耆民話夕陽

詩人例作揚州守最憶蘇潭與古愚可惜東山舊絲竹
蠻風蚤雨鎮愁子

坐中舊雨兼新雨不奈窮愁間別愁我與黃梅花有約
年年相見在揚州

齒痛既愈謝張二琦

謂剛則易折藤蘿望秋靡默可全吾生寒蟬抱枝死入
世不安命擇術窮屢徙頻年足憂患飢餓到脣齒張郎
今仲景藥石夙所恃爲我探病源非由內熱起投我以
薑桂藥味辛且旨庸醫方目笑我痛霍然止頑軀乏媚
骨廣坐集衆指玉碎寧不傷瓦全性所耻因君信益堅
諤諤終自矢

崇百藥齋文集第五

受業季廷幹校字

崇百藥齋文集第六

陽湖陸繼輅祁孫

宣南集

芳樹八韻

芳樹綠悵悵簾波一徑深甘幃休貯玉秦印薄懸金鏡
影融春曉釵光破夕陰露中飄蕙氣絃外佇琴音坐久
香消篆眠遲月滿衿低鬟支淺醉點展諱微吟笑覺拈
花暫寒因倚竹禁漫誇仙福豔樂意費幽尋

題東海孝婦祠

男兒對簿古所耻伏劍忽忽輕一死何況生爲女子身
三木寧堪著肢體不如誣服獄易成畱取奇冤照青史

姑女亦勿瞋酷吏亦勿怒白璧可碎不可污君不見田
司農蕭太傅

汶上

居然風景似江鄉新麥濃青柳淡黃我有漁竿拋未得
鞭絲引夢到橫塘

車中對月

爲愛清輝臥未安褰帷堅坐耐春寒天涯了了相思影
可許離人鏡裏看

車中示老僕丁榮

曉日壓寒氣凜凜侵肌膚重衾類潑水何況我僕痛蒼
蒼十八程汝復何所圖我昔郡縣試文成已啼鳥出門

迷東西不辨還家塗高高擎一燈賴汝候路隅見我色
然喜舉手相招呼自我舉茂才信我能讀書七年應鄉
舉三度徵公車無不與汝偕面塵冰滿鬚浮名有得喪
悲喜真不誣荏苒入此歲汝年五十餘勞苦漸不任夜
臥聞纍歎以汝貌衰醜重我心躊躇方汝筋力壯頗足
供馳驅曷不舍我去衛霍或汝需轉輾爲我誤曾不離
斯須得毋挾賒願微幸收桑榆我亦四十人寧不知頭
顱蕭郎故晚達齒冷愁旁奴作詩述往事紀實非過譽
吟成呼汝聽淚落如連珠皇天白日速曠野浮雲徂加
餐各努力挈汝游天衢

詠落花次李四

兆洛韻

一尊重與餞餘春不信司花尙有神耐盡曉寒緣底事
照來殘月又經旬濛濛霧暗前溪路昔昔鹽傷倚檻人
此日元規團扇底也揀俊語賦香塵

簾櫳寂寂雨霏霏紅綠空煩較瘦肥翦綵工夫貧女少
攀條涕淚故人稀轉嫌橫幅當窗見偏阻迴風別院飛
只有飄零雙燕子儘含清睇惜芳菲

答汪大次來韻

綺思逐春盡閒愁入夜深已都無遠志猶自忍歸心焚
研餘殘墨哀絃耻碎琴向來能壯語怪爾動悲吟

絕代

絕代有佳人幽居忍翠輦莊嚴虛七寶風雨過三春霜

月豔遙夜露荷明向晨惟應祝秋水鑄爾鏡中身

古意送吳二階之官

美人惜晚嫁三復標梅詩已病通辭易仍怨接歡遲東
鄰小女年十六抱出阿侯如白玉心知不逮妾容光無
柰春陽隔寒竹曉日瑣窗明雙雙青鳥鳴浣紗溪畔路
報道七香迎七香行緩緩未覺秋宵短阿姥知卿已十
年手理機絲待卿轉君不見縑新素故夙所歎佳人易
得賢婦難

耀通書至知自西安南返不果北來却寄

正月別鄉縣二月來至京三月試禮部文若翻水成欣
然示同輩緯史復經經四月既下第何以遲遲行明年

值

萬壽有

詔徵俊英我非慕軒冕祿養心回縈寒士出門苦踽踽
何俦俦故門乞資斧竭忠慚友生我去尙云易我來心
暗驚晨昏寧不戀進退相距迎忍此一年別不覺雙淚
傾

五月得家書大母望我還汝又且西至逝將發潼關浩
然變初心終宵撫刀鏡前日得汝信展看淚汎瀾願叔
且暫畱姪歸能承歡我心唯汝知我責賴汝寬但汝何
所恃支此饑與寒我自處於易使汝爲其難汝又鮮兄
弟惻愴摧心肝

今我畱京師苑塞無歡衿殷勤相慰藉豈乏空谷音汪

竹海劉美初及蔡說霞許青士知我鄉思深勸我酌清

酒爲我動高吟我時發狂言故態不自禁一笑未及已

百感忽復侵倚閭正愁寂我樂吁何心默默對庭柯淒

然感移陰

城南一蕭寺濃蔭多古木狂塵接天黃獨此一庭綠吳

生次升入覲來招我避三伏我復攜周郎伯恬聯牀雨

聲續朝來舍我去獨立聽轉轂依人氣漸低得官貧轉

酷嗟哉二三子何用慰幽獨

凌晨檢行李言就管子孝侯居此子抱深慄魚水相與

娛稍恨處太僻遠隔城南隅城南誰最憶南墅多藏書

中有謫仙人

申耆

罷值承明廬行將去爲吏會面從此

疎此日足可惜胡不昕夕俱握手若遠適欲別還躊躇
慈闈尙千里私愛徒區區

我婦與汝婦同居逾十年各守毋違訓用是無間言汝
婦敬畏汝汝歸婦益賢我婦亦婉順所短惟遷延往往
阿母呼翻訝行不前甚或唯而起手尙持一編我雖屢
誠之柰彼性所偏汝示以此詩努力承慈顏

阿循年十七詩筆劇清異高視輕其儔已招俗眼忌我
昔如渠年狂亦空一世竭來束憂患駑馬亂德驥一庸
息衆毀人海此孤寄子弟患矜才磨折亦易易慎毋督
過嚴損彼凌雲氣

無成迫壯歲何計娛衰親望汝登賢書事亦安可論外
求計良左至樂惟天倫阿循若娶婦便冀汝抱孫過此
復廿年大母壽九旬來孫置剏上此瑞古未聞天心重
苦節涕泣希洪恩

終夜不成寐輒眄吾兄來生小未識面我夢當見誰推
枕起默禱媿謝弟不才無成迫壯歲莫慰慈母懷母慈
不爲罪念我心徘徊願兄却疵癘勿使顏色衰終當竊
升斗侍養期無違

寄鄭秀才

灑若

絕憶工詩鄭鷓鴣仙才逸韻滿江湖未妨汧國封名妓
直蓄崑崙作老奴金彈一林春罷獵寶刀如雪夜呼盧

銜環飛殺雙青雀人在臨邛賣酒圖

聞耀適鄉試不中選

承歡百無術拙計求科名春陰既垂翅秋高思一鳴心事如孤鴻風影時時驚翻願消息遲餘慶猶可憑懸旌忽吹斷化作大海萍下第曾幾日復此傷親情況聞病甫愈稍稍需人行憐孫彌念子寧免涕淚零父兄昔初逝辛勤授遺經非將博榮利何力勝躬耕孤兒擅文譽生計益伶俜由來爲貧仕豈有他塗升投身入此障達觀殊未能世有追風驥甘爲附尾蠅送兒見阿母萬慮胸中平

得亦何足快失乃生悲吁此意當告誰安知非鄙夫江

南應試士萬有三千餘從教抱淵鑑豈得無遺珠以我
逝水年邀君一日譽棄置勿復道託業誠區區

讀唐詩

含意有未伸對面隔九疑古人去千載豁若肝膽披夜
夢見眉宇朝吟慰調饑因之悟身後何必知音稀願將
懷古情與君結相思

青蓮志刪述垂輝映千秋謀人旣不遂退乃爲身謀朱
顏日以衰幻想虛瀛洲一朝委恒幹愚智同山邱尙及
投荒暇寫我平生憂由來不死藥自足非外求重門掩
風雨浩蕩極天游

朝吟題飲酒暮吟日游仙遂疑曠士懷縹緲凌飛煙寧

知謝珪組未忍耽林泉深憂在宮禁遠慮及邊關再拜
祝柔翰冀汝回天顏天門深九重空復容危言何時採
風使詆蕩下高軒

王孫耽苦吟五字追曹劉世人惜早逝文果與命讎豈
知志士懷所爭在千秋中年足哀樂何爲久淹畱天心
有憎愛未可淺識求彼哉多壽翁視之若蜉蝣

浮慕不終日中道忽回車未覺新歡盛焉知故業疎吾
愛高渤海官貴方著書低顏處讒謗是亦窮者徒英英
二三子高足臨亨衢終當倦馳騁爲君佩璫琚

絳灌不好武題贈歡平生縞紵日以廣豪素日以輕詩
人有獨行一字三年成不學錢考功朝朝賦送行

皓月弄花影影是光所遺幽輝寧久駐託根終弗移玉
溪飲湘波口吐五色絲君子懲冶容膏沐將安施才多
信爲患志潔誰見知夔曠不並世千載以爲期

堂上操玉尺堂下環青袍貴人方欠伸午風花亂飄哀
哉方三拜兔缺徒見嘲當時衡文者棄汝輕鴻毛夏蟲
緣松枝安得見後凋

女蘿附喬木葉葉明朝陽喬木摧作薪敗蔓委路旁河
東旣放廢年命亦不長道枉誠非惜身殉良可傷我有
陶家釀玉壺含冷芳何時共斟酌爲君葆容光

彭城差老壽垂暮典秩宗豈翳推挽力祿位亦頗崇迷
復苦不早壯往難爲功當其入世初眠食何忽忽未聞

役五丁遂與蓬萊通
君子貴知命進退恒雍容
毋爲夸附驥
惟當懲忼龍

九華山色好中有惜花人
自言嬋娟誤對此愁輕塵豔
色寧久徵第一昭陽春
當時浣紗伴望斷巫山雲
巫雲受風吹零落汴水濱
靡蕪爲誰綠環珮無歸魂
由來守貞女不是可憐身

宰相無他技得人
以爲忠尙懷植黨嫌寒素何由通
昔夢平泉莊鬱鬱松柏桐
琴韻出高閣鑪香拂綺櫳
白雲忽西逝八部迎天龍
崖州望不極矧欲挽仙蹤

鄴侯旣當國顧况期同升
故人作天子乃有巖子陵
翻然悟窮達歸訪茅山僧
墮地七尺軀肯作附驥蠅
殷勤

舊來約僕病方未能

捷徑固所耻知音良獨難
冰絃未斷絕那惜千萬彈
珠簾粲玉齒秋士迴春顏
我讀輞川詩高若不可攀
何如冶游客清歌聽雙鬟

陋儒論成敗卽事難與爭
杜陵比稷卨大笑譁蠅聲
嗟彼齷齪懷焉知慷慨情
齊王反手易孔治期月成
虛言亦何補寂寂孤平生
會當建奇策一使俗眼驚

西原賊方劇道州獨見全
諒哉保障力乃曰蒙哀憐
賦詩誠官吏往復何纏綿
貪功旣所耻養癰豈能賢
願書春陵行插羽示九邊

青雲置身易白雪和歌難
華實君未剖雕飾若爲看滄

浪喜譚菟意乃輕郊寒文章千古事不辨爲君歡

和劉隨州八詠

幽琴

孤根植風雨何意作琴材黃葉深未埽朱絃今又哀可
能諧竹肉空與飾金徽惟應舊棲鳳曲罷一飛來

晚桃

綠陰深似幄忽漫見餘紅已教憐夜雨猶是忍朝風馬
蹄三月倦鶯燕一春空可待成芳實瑤瑤出漢宮

秦鏡

咸陽三月火澄輝底許畱明心勞作證豔影若爲酬詎
有雲堪掩休教花見羞新粧未云晚文君易白頭

古劍

恩讎百年盡閱世忽已深爲誰成勁草聊與伴橫琴竹
帛當時夢刀鏤此夜心削葵非汝責莫漫作龍吟

疲馬

秋星黃欲墮春草碧無情飽食能銷骨空槽試一鳴識
塗收效晚守戶報恩輕國殤如待裹爲爾盡餘生

舊井

曾經照玉顏涼月圓如故輓轡類芳心終朝未曾住蒼
苔橫石闌桐葉委秋蠹那得井邊人嬌鬢不成素

白鷺

蘆花如積雪聊可託幽棲辨鶴無丹頂隨鴉惜素衣波

明閒對影月黑見孤飛征鴻勞問訊所得是忘機

寒缸

華燭翻垂淚寒燈自作花欣欣此中意未足向君誇送
暖憐村酒分光近紡車心知竹窗外冰柱在簷牙

和陶詩五首

貧士

羣鳥易得食孤鳳難爲棲豈翳閤文采空山乏華芝徒
藏富民術待補南陔辭枉尺獲所藉膚寸終安施君親
尚弗易矧復妻孥私勗哉負薪子慎勿生然疑

乞食

朱戶迎朝陽當關厭晨客區區求一飽耻並槐柳植英

雄昔亡命日暮有饑色農具幸無恙何爲去鄉國承歡
父母心勞生天地德行矣謝雞鶩羈棲慎所擇

穫稻

先人遺薄田近在屋左側今年暘雨時早稻已可食晨
興聞飯香婦子含喜色一盂奉母前是兒手中植欣然
爲加餐園蔬佐新摘勞苦罔不酬何爲惜筋力

獨飲

與來偶有詣中道還自歸急雨適飄灑幸未沾我衣山
妻覺無緒手自潔酒卮林筍方抽芽湖蓴亦牽絲陶然
成獨醉身世忽若遺宛宛雙寒鴉天風謝高飛

閒居

良辰愛重九風雨亦復佳菊苗蒔已久欣然見花開償
遲願彌慰欲速境屢乖宋玉自多感江淹徒費才借問
謝安石中年何所哀由來閒居意不廛託深杯

秋懷

夕晒秋月朗朝晒秋風清秋風一以吹蕭槭難爲情舉
世狃所習矯枉何由平驕人貧賤耻得志盛滿傾草木
有榮落金石無虧盈五鼎苟弗媿豈必希躬耕

名士多悲秋華年惜飄忽遐哉李青蓮獨覺秋氣逸邁
邁送時運戚戚慮衰歇貪生或求仙畏死斯佞佛虛空
自恢廓何由著膠漆放眼觀千秋努力答今日

春鳥解催耕秋蟲復勸織農桑昔未創端倪此焉測祭

義援八蜡當先貓虎食因推生物心庶用竭人力征鴻
爾何能徒矜一丁識爲誰傳尺書天風入雙翼

枯楊何意態偃蹇當高樓其下一松樹鬱鬱如潛蚪未
沐雨露恩焉資梁棟求朽株快斬伐披雲豁雙眸謂當
萌芽怒仍此顏色幽凌霄終有時媿爾忘恩讎

秋雨適鄉夢羣蠅迹如埽車聲何闐闐依然破清曉蝘
行若牛鬪聰聰乃滋擾不然蠻觸爭誰辨壯與老黃葉
下蕭蕭流泉鳴浩浩借問山中人何如長安道

飛螢乘月晦兩兩下疎林流光相照耀寧知秋已深無
煩驅除力歲寒非爾任但恐春草長又或值愁霖滋生
一以繁厯亂沾我襟所以妬五陽惕然畏初陰

寂寂上公第

時假館行聖公邸

朱門類空谷斜日憑回闌瘦影

入深竹炎塵尙飄黃秋雨待轉綠勁節固無恙生意終已蹙因之感蕉萃誰與證幽獨惘惘懷佳人茗茗阻芳

躅

市菊種秋院粲然盈夕曛慚無灌溉力享此紛華陳羈懷久枯槁一醉酬芳晨明年足春雨菊苗應又新殷勤期後客毋使傷荆榛桑下已三宿柰此未來因

下階見殘月悽愴難爲辭心知團圓夕及照芳華姿虧盈信有常風雨或間之勛名本偶值寧必副所期營營既可哂咄咄亦何爲識疎而志大終令後世嗤

宿昔別張翰

宛鄰

凌晨送丁儀

若士

日色未云薄顧影

忽淒淒新交日以廣故人日以離還問何所迫爲此分
道馳平生偕隱約虛願期堅持毋悲境束縛但恐心然
疑

除日簡趙五員外

學轍

三十六除日年年膝下身因誰生羽翼來此閱冬春味
薄迎神酒風高饋歲塵唯應藏債帥聊與共蕭晨

除夕洪大過宿寓齋

各有還鄉夢相憐未倦時鑪溫茶味醜戶密燭痕遲隔
巷喧收債殘香罷祭詩不須商出處下第是歸期

崇百藥齋文集第六

受業萬于琪校字

崇百藥齋文集第七

陽湖陸繼輅孫

熊耳集

抵永寧贈魏大令

襄

容易清宵共一燈，分明此景夢中曾。
十年往事傷今昔，九死餘生付友朋。
回首軟塵春有霧，關心宿草淚成冰。

謝皋文朗甫傳承叔校

與君且盡尊前話，多恐重逢更不勝。

七夕寄君淑君素君孚

開眉對新月，約伴拜雙星。
因愁客窗雨，聊憶故園晴。
阿母扶闌看，雛鬟喚酒行。
荷香露中發，釵釵燭邊明。
欲知誰得巧，侵曉試吳綾。

魏永寧署舍晤蔣四

維時作

錢塘江水明於練我飲春潮識君面臨平古刹秋蕭森
我餐山翠知君心當時風日特清妙天與才情助年少
長紅小白一萬枝總遜潘郎鏡中貌君年差長氣轉豪
黃金白璧輕鴻毛閒來爲我買歌笑醉眼但覺青天高
中丞謝蘊山丈移節蠻煙遠方伯秦少司寇時旋歌歸緩緩
刺史蔣表兄重耀休官司馬華君瑞黃貧湖船從此無絃筦與君
揮手向天涯題句全昏壁上紗已報瑤官收芍藥還聞
石磴碎琵琶花穠月滿堪愁絕不待相思銷俠骨十載
重逢鄉子城征衫照眼都成雪今年策馬度成皋斗大
山城晝寂寥忽憶蘇公祠下讎雪花尙作絳雲飄君才

自入循良傳歎惜左車曾未戰書生作吏骨仍仙

謂永寧

借箸知君有深祿祇我心期愧昔賢
恩恩哀樂偏中年
昌黎將相知非分司馬文章亦可憐
人生落莫元如寄
我意升天輸入地定省依然膝下身
別離不墮尊前涕
故人早結歲寒盟

謂永寧

照我還挑舊短檠
回首已無家
可戀論心况與月同明
蕭蕭竹影圍深綠
似此官齋殊
遠俗與君便作故鄉看
各自胸中平五嶽

小游仙

秘籍何因見玉清
紛紛下界說前生
從教偽誤雲英傳
豈有神仙更好名

早向西池侍謙回
天厨珍腴費疑猜
雲芝瑤筍清寒甚

那有麒麟作脯來

月輪天底雪光浮
隱隱輕寒上玉樓
擘取濃雲鋪作絮
笑他人世吉光裘

上清蝌蚪讀無餘
却向鮫宮錄異書
手摘星辰三百顆
小樓懸徧夜光珠

無端飛語謗雙成
兒女閒情律最輕
不似人間刑法酷
樽前平視殺劉楨

霓裳纔着又頻催
法曲琅函次第開
却笑阿瞞誇作賊
幾曾偷去紫雲迴

小住瑤臺第幾層
淮南妄語本無憑
罡風一扇銷凡骨
雞犬何因得上昇

仙姝次第榜瑤京玉箸金泥署小名燕瘦環肥都下下
不應一笑便傾城

聽說神方笑不禁紛紛點石費招尋天孫雙腕明如玉
袖底曾無纏臂金

幻術虛傳石作糧一般衣食費商量吳孃寫韻無聊甚
擬乞人間辟穀方

茗茗春信兩心知不是銀河得報遲情徧錦鱗三萬六
更將何語寫相思

玉旨初徵協律郎仙姝約伴看吟狂麻姑不覺紅雙頰
指爪分明似妾長

一例人天重少年孫郎風骨最高騫若教享得人間壽

玉貌何因到九天

日星河嶽記來真亦有凡禽雜鳳麟若使神仙盡忠孝
左元仙伯又何人

羣仙遮莫乞元霜第一豐容冠上方見說新來收侍女
更從何處百寒簧

暇日臨趙文敏自書詩帖愛其句調清轉因和擣
衣溪上二律屬有所作輒用其韻凡十二首

聞擣衣用元韻

早是傷離望遠天客衣珍重待裘棉淚經幾浣還如昨
線已重縫不似前每到乍涼成悵惘乞畱殘月共嬋娟
郎當鈴語聽來慣爲爾臨風一泣然

溪上用元韻

溪上游魚哂蓼花溪邊雙鷺立平沙牽蘿可待禁秋雨
弄扇應教感歲華酒俠詩狂成在事兒春婦織是誰家
一畦乞與無多地願趁新霜餉晚瓜

賈孝廉自湯陰來攜示岳忠武手書石刻用岳
王墓韻書後

南朝父子痛生離事較分羹更可危未若孤臣埋碧血
尙畱將種侍靈旗高天從此讎同戴大厦非關力不支
歌罷小重山一闕知音自古有餘悲

憶小元池仙館用城南山堂韻

珍重雙梧帶雨栽紅欄曲曲碧雲隈料量雪水先春貯

一半秋花向晚開
寫韻偶拋人獨坐
下簾長待燕歸來
分明爾許閒中意
不信離腸只九迴

題亡友金庶常

式玉

遺集用雨華臺因至故人

劉叔亮墓韻

繁澗回首碧波空
剩有才名在卷中
三月鶯花京國夢

一燈涕淚故人同

謂魏大令

怱怱游興浮雲外
黯黯離情大

道東此日扶容零
落盡年年腸斷白蘋風

君未識余先以所著白荷

花賦見寄

金谷園再用雨華臺韻

憶昔繁華夢未空
晉家全盛卅年中
金甌旋共名園破
石友虛憐歸路同
豈有狂游知日暮
尙畱餘韻誤江東

劉琨亦是尊前客，獨聽雞聲向曉風。

北邙山用東陽八詠樓韻

萋萋衰草接斜暉，幾度登臨送大歸。故鬼可能成鶴去，亡王曾此逐螢飛。空煩薤露歌當哭，賸有松欒列作圍。我是鮮民餘一死，牛山無淚更沾衣。

有寄用海子上卽事韻

天遣才多恨亦多，同岑其柰異苔何。倚樓便作凌雲想，點屐微聞對月歌。白練從教揮醉墨，碧筩親爲摘新荷。浣紗溪畔三篙水，可許閒身託釣蓑。

讀樊南集祭令狐相公文有感，用錢塘懷古韻

塵中何地著恩讎，掩卷無端感昔游。高屐登山詩擬謝

清樽顧曲客疑周狂蹤杜牧連宵記別淚唐衢接海流
只恐更傷泉下意蒿蓬已分一生愁

聞劉編修請假用贈周景遠田師孟韻

照眼波光蕩客愁關津歷歷愴前游此行便抵還鄉錦
往事真憐上水舟茅屋年深應待補玉堂地迴不宜秋
江村計日霜螯滿百感橫胸醉亦休

擣衣溪上二律一時和作甚多用春日言懷韻
報謝諸君子

才如腰帶減來頻多媿諸公句有神本以孤吟消夜雨
恰分離思餉征人傳書更喜長安近謂阿劭時客西安飽飯都
忘廉吏貧謂魏永年只我悲秋渾易遣禁持不柰是傷春戲錢

丈六

題前秦錄三用雨華臺韻

鬼哭新平霸業空
大魚破浪十年中
奪吾景畧天何速
授汝龍驤事竟同
漫索家兄來鄴下
從教兒輩笑江東
謝公此日應高臥
閒殺淮南草木風

和魏永寧消夏四咏

歎壺

秋花多病葉盡日
忍幽芳賴汝作霖雨
因之生晚涼
略如潮有信不礙
月窺廊試展青蒲
坐苔痕一徑蒼

響竹

漫續憎蠅賦聽雞
誤好音是誰攢碎
玉爲我護幽琴止

棘銷讒口彈蕉本素心暑風吹未已莫厭畫簾深

蕉扇

茗茗辭故林欸欸接蘭衿誰唱留連曲能傷宛轉心長
圓憐月魄惜別驗桐陰莫展王維畫秋風已不禁

荷筩

鄉思隨花發伊人對影雙弄珠憐曉露累麴近春江瓜
擘迎涼謙燈昏聽雨窗可能畱淺醉引夢上歸艖

久不得阿劭書

時客
西安

自我爲鮮民鄉夢輒易寤纏綿一片心舍汝更誰付十
日寄一書要約亦已固不厭書辭複所恐郵筩誤柰何
匝月久疎闊改常度積思反生怨經變每多怖推簾看

斜陽此日復成故

悼莊兵備振

中衰悲外氏盛歲喪斯人慈惠留三郡蒼黃徧九嫀病
疑方藥誤書尙墨痕新塵世亦何樂泉臺有二親

聞蔣三

知讓

歿後母夫人尙畱揚州愴然有作

春明送我君初病

已巳四月晤君都下已患喘不能劇譚矣

苦說浮生日易

斜月地花天宜有劫名場宦海兩無家閉門何計麾紅
拂伏枕猶聞誦白華腸斷秋江明似練儘措老眼望歸
雅

寄婦

風林無靜柯逝水無回波嗟哉再期喪爲日曾幾何啟

篋易舊衣衣線平不頗昔著侍母旁着手千摩挲辭母
將出門別淚霑滂沱今汝故無恙萬事成蹉跎畱汝殉
遺體裹骨歸山阿

遺體母所愛豈徒戒毀傷內充在忠信外飾惟文章奄
然腐草盡曷驗世澤長賴君述母誠如我在母旁時時
勤拂濯庶幾發幽光

君雖異骨肉母愛固維均君性遠浮薄亦漸習儉勤煌
煌我母訓一一堪貞珉知艱行匪易百善惟一真母柩
猶在堂何殊侍晨昏我謀營葬資違禮傷哉貧幸蒙故
人諾負土期來春墓旁築茅屋降鑒終兒身

旌罰通幽明厥柄天所持柰何尼父聖生死不並知猗

歟我顯妣令德絕譽尤神當返兜率否卽歸瑤池所慮
我與君積咎淪泥犁遺訓苟無負承歡終有期

得家書

三年重署平安字乍見題封已斷腸料得一燈昏似豆
寫書人坐總幃旁

喜雨和魏永寧

憐君農事已都諳盼得山雲雨意含一樣小窗人話舊
今宵簾影似江南

賈太傅祠

斑斑清淚漬遺文草草荒祠拜夕曛聊以哀音酬正則
直留故事誤劉蕡蠻鄉秋早萎芳杜帝里天高隔暮雲

猶勝後來狂阮籍窮途一哭更誰聞

強項令祠

蟲書鬱鬱見蟠螭一路看碑過偃師却向道旁懷酷吏
秋風長揖董宣祠

過夾馬營作

倉猝黃袍事可知他年燈影又傳疑捧觴寧踐梁王約
納策難憑楊素辭半壁江山還故物一舟風雨送孤兒
何因天視明如許尙有人間靖難師

謝魏永寧饋藥

苦口知藥良逆心期道適故人回清臚爲我鑿肥瘠我
參住世諦因探元冥宅泯耳斯常淵忘目乃生白誰言

志士懷絕異，小人戚得喪。苟未齊哀樂，各乘隙悔遲。悲前囂悟來，守今寂無煩。贈刀圭行將壽，金石

禽言一首贈賈孝廉

鵬

山城竹樹深，復深中有一雙。辭巢禽辭巢，怪爾飛何急。我解禽言爲禽泣，一禽將雛愁歲寒。一禽返哺頽驚翰，翰雖驚不遑息。母待兒歸樂晚食，精衛空銜海邊石。丹山桐花掃無迹，老鳳清聲向春寂。顧謝天風入，雙翼恨不羣。雛輕一擲化作遊絲入空碧，禽言如此君努力。君不見鮮民身在心，已朽祿逮親存望吾友。

悼馮生

海上重經處，茫茫見白沙。琴薪烹紫鳳，山刃割朱霞。佛

鏡層層幄仙裙寸寸紗陽春鎮如許幾度泣唐花
見說鴛鴦塚先飛蛺蝶灰寶函緘秘押涼玉暈初偃貝
古含雞舌珠還謝蚌胎唯應徵月戶爲爾築泉臺

題趙公子長庚遺集

爲蔣上舍學沂作
趙新建人年十八

不隨俱化是殘編鏡影難銷絕世妍誰轉法輪循恨轍
自橫慧劍截流年茫茫天畔無樓閣隱隱秋墳有管絃
慰汝祝子千點淚由來才鬼勝頑仙

不寐作

秋衾奇暖似濃春可待靈犀爲辟塵驗取捐除煩惱障
新來不厭柝聲頻

牛角慵聽長夜怨尊羹都忘故鄉思憑誰寫此無人態

春水閒鷗夢醒時

黃梁熟後太無聊
天遣清心佇寂寥
一樣月明風露冷
當年曾是可憐宵

懷荔生

小春七日卽飛雪
此夜鄉心覺漸真
知爾綠暉橋畔路
衝泥買醉共何人

十二月初九夜夢獨坐趙青州文雲溪水榭作絕句一首醒後忘首二語枕上足成之并寄青州

畫樓三面接垂楊
夢裏春愁覺後長
西下夕陽東上月
雨絲五尺水中央

崇百藥齋文集第七

受業黃承谷校字